

Građanski forum u Banjaluci: Građani u oba entiteta suočavaju se sa istim problemima

U sklopu svoje predanosti da sasluša i čuje glasove građana i pomogne građanskom društvu da zauzme veću ulogu na političkoj sceni Bosne i Hercegovine, Visoki predstavnik, Wolfgang Petritsch, jučer je u Uredu OHR-a u Banjaluci održao treći sastanak Građanskog foruma. Ovo je bio prvi takav sastanak održan u Republici Srpskoj.

Zaključak koji je preovladavao, a koji je Visoki predstavnik izvukao iz trosatne rasprave o društvenim problemima u Bosni i Hercegovini bio je da su mnogi problemi sa kojima se suočavaju građani u oba entiteta identični; postoje, također, i značajne sličnosti u predloženim rješenjima za ove probleme.

“Pitanja koja vi pokrećete su ista kao i ona koja sam čuo u Sarajevu”, Visoki predstavnik je rekao devetorici gostiju. “Među ljudima dva entiteta ima manje razlika nego što bi se na prvi pogled pomislilo ili nego što političari sugeriraju. To me ohrabruje da budem strožiji prema onima koji zagovaraju podjelu”.

Debata se dotakla ponižavajućih okolnosti u kojima se često nalaze povratnici i raseljena lica; implementacije imovinskih zakona; siromaštva i ekonomskih i finansijskih problema koji prožimaju svaku sferu društva; nepostojanja zakonodavnog ambijenta koji pogoduje investiranju; korupcije; politički

nametnute podjele građanskog i kulturnog života u BiH po entitetskom ključu; suštinske uloge medija i posebno javnog emitiranja; dominacija politickog sistema u BiH etničkim pitanjima koja se nastavlja te je i dalje karakterizirana široko rasprostranjenom manipulacijom građana od strane političkih stranaka; daljnjeg uticaja nacionalističkih ekstremista i ratnih zločinaca; značaja i željenih rezultata implementacije odluke Ustavnog suda o "konstitutivnosti naroda"; i nedostatka entuzijazma mnogih političkih lidera i građana za integraciju BiH u Evropu.

U zaključku diskusije, Visoki predstavnik je podstakao svoje goste da se nastave boriti za svoja uvjerenja. "Moderno društvo se zasniva na pojedincu a ne kolektivu", rekao je on. "Modernom društvu potrebni su građani koji će uzeti aktivno učešće u oblikovanju politike i društva; građani koji pokušavaju iznaći zajednicke interese i rade u interesu cijelog društva." On je obećao da će nastaviti sa promoviranjem pozitivnog razvoja građanskog sektora.

Gosti na sastanku Građanskog foruma bili su, abecednim redom, sljedeći: Zekija Haznadar, bivši gradonačelnik Banjaluke; Draško Ignjatić, glavni i odgovorni urednik IPP-a RTRS-a; Muharem Insanić, dirigent kamernog orkestra "Arion" u Banjaluci; Lana Jajčević, pravnik NVO "Udružene žene" iz Banjaluke; Ljiljana Mijović, šef Centra za ljudska prava u Banjaluci; Zorana Petković, direktor radija "Osvit" iz Zvornika; dr. Rajko Tomas, profesor na Ekonomskom fakultetu Univerziteta u Banjaluci; Branko Todorović, direktor Helsinškog komiteta za ljudska prava u RS sa sjedištem u Bijeljini; i Lidiya Živanović, direktor NVO Helsinško građansko vijeće iz Banjaluke.

Visoki predstavnik je osnovao Građanski forum radi promoviranja dijaloga između međunarodne zajednice i intelektualaca i predstavnika građanskog društva u Bosni i

Hercegovini. On namjerava političkim inicijativama podržati neke prijedloge koji su dati na sastancima Građanskog Foruma. Prva dva sastanka Građanskog foruma održana su u domu Visokog predstavnika u Sarajevu, 11. oktobra i 21 novembra. Na svakom sastanku učestvuje do deset gostiju i mijenjaju se od sastanka do sastanka.